



得齋詩文鈔

一

柳田文庫
文庫11
A1142
1



文庫11
1142
1

長戶讓士讓著

得齋詩文鈔三卷

嘉永五年壬子季夏刊

柳田泉文庫

得齋詩文抄序

長戶讓士讓

詩文之於世隆不技而能
了亦自得乃不能由寫性
情以表法猶墨也若其法
爾依仿古人亦能統窠白
者曷足与法之其然士之
石與世或細細乎亦亦以上

得齋詩文抄序

或考其樂中溪山之百五
運固不同而取自得亦各
異於是然其考之亦以林
勢及於也為約應文學也
石上漢頃曰其亦應乃而
結文抄本尺示且信之序
其文暢達與亦亦其詩亦

雅而流燕以後自以中法
出家教以以林之神是士
漢身任仕藉志存山水故
然於方今持紀主刻得
文存為開康康新去符法
得於善端法自好得子
頃耳特此編之其何自

得賦吾月之閱考之公論
是男之素也士庶崇其君
狀更之門由正先極字亦
獎誘予之志衣衣目夕文
古娛臨而冊裁之友士讓
下惟博車宿海之在年回
考發接雅而和自明業不

倦可長進不可涯後而今
片端之以讀考世之以視
可寸學矣士讓展表志此
是游儒法正先而叙之今
只起於予之孫叙之生存沒
之或而河如身故予并一云
不事也而父之故其六尋亡

見之者莫不也

素心王子孫六月下海

蒲溪林德元

日聖柳原集書



得齋詩文鈔敘

余弱冠入昌平黌。得交天下俊髦之士。而長戶
君士讓。才學文章。表表乎儕輩中。士讓不遐棄
余。締交尤親。昕夕切磋。時亦取天下古今成敗
得失。反覆辯論。未嘗不發憤慷慨也。數年士讓
遊四方。余亦漫遊而還。受業於一齋藤先生。因
登快烈林公之門。則士讓已在其門。俱入百之
寮。亦復同窻切劘。心交更鞏。既而士讓業成。下

惟於築地街。而余謬為師門都講。住林公邸內。是時師門老宿。先後凋謝。其存者落落如晨星。而士讓以後進之秀。往來幾無虛月。相與商確經史。縱論劇談。未嘗不與昔年同也。何其締交之愈久而愈深也。士讓詩又極富。近者抽其數百篇。釐為三卷。曰得齋詩文鈔。將以攻梓。而屬余介其首。余一讀。乃益嘉其才捷學博。駸駸乎進而不已也。昔人有言。非憤無以成其志。非志

無以洩其憤。故有志之士。必先跋涉四方。困心衡慮。勞筋骨。餓體膚。以發其憤。而壯其氣。然後學可以成焉。士讓加納人。少時登仕籍。一日慨然曰。有志之士。何以此簿書為。乃固請辭仕。負笈求師。間關於京攝勢尾之間。而後來江都。時又跋涉四方。幽邃遐僻之境。恠竒絕特之觀。恚莫不探討焉。想其祁寒暑雨。困頓流離。千辛萬艱。必有不堪者矣。乃與其胸中之竒相觸。激昂

感憤。蘊蓄已久。發為文詩。則風月窈窕。霜露悽愴。憂樂愉戚。洋洋滔滔。溢於楮墨間者。不亦為宜乎。迨士讓住都。再仕藩為儒官。學益進。業益廣。挾策請教者。屢滿戶外。藻壇赤幟。屹然已樹矣。而思其所以成之者。未嘗非發憤立志。慨然跋涉四方之所致也。余亦好游者。四方山川之奇。頗搜討焉。然不能及士讓足跡之半。是其所以不能無愧於士讓也。士讓有游記數部。嘗缺

其北道遊簿。余既序之。則今日介首之屬。亦豈有可辭耶。因舉其締交之由。與其所以成業者。書之簡端。若其措辭之巧。布字之精。則曷俟余揄揚也哉。

嘉永五年歲次壬子季夏

藻海

河田興撰



荻野貫書

得齋詩文鈔序
余於甲子年春
書之簡牘於其時雖之於本字之於其時亦於
百下其時因舉其於文之由與其於以於其於
其於並並舉余於其之限今日介首之於亦於

得齋詩文鈔目次

詩

五六七言絕句合二百三十七首

五七言律及五言排律合百四十首

五七言古詩及詩餘合三十三首

通計四百首

文

序十首

記十一首

論二首

墓銘四首

題跋雜文合九首

通計三十六首



得齋詩文鈔卷一

詩

古風二首

堂堂日出國。一姓傳百王。尊卑有定分。臣僚無覬情。乾
 坤占中位。玉燭自調明。布粟紛如土。人人易作生。環以
 大瀛海。拒絕蠻夷兵。山河鍾靈秀。風氣本淳良。古稱君
 子國。原識非虛名。五大洲土中。誰為兄弟行。
 關東開幕府。葵葉永蕃滋。深仁如雨澤。威武似熊羆。三

加納 長戶讓士讓 著

百列侯伯朝同隨指揮。八萬麾下士奉職各奔馳。大政
所覃被四海盡風靡。下臻飛泳類莫不浴餘熙。推原其
所自。元和神武姿。擲風而沐雨。建此丕丕基。文孫
繼先緒。恪守不曾遺。綿綿傳國祚。福祉無休時。伊摯固
遜伏。姬且豈肩隨。仰想感何已。謳歌發所思。

本邦十一物詠次。檉字林公原押。

百卉蘇回二月風。爛然芽發滿林楓。唐山漫道吳江好。
可有春秋兩度紅。春楓

一種奇葩不易名。權稱自古漫呼櫻。欲知根性超高處。
獨向東方靈域生。櫻

井手津頭水若油。金葩滿岸弄春柔。王孫飲馬今何處。
但有黃雲落影流。山吹

不求遺粒向檐前。決起穿雲忽杳然。麥隴桑原棲止穩。
欲將何事告青天。雲雀

只訝籬根雪未融。數枝搖曳野村風。天然已具超塵態。
便是花中白兔公。卯花

鐘漏沈沈夜幾更。江村月落水鷄鳴。幽人欲作誰何問。
彷彿柴門剝啄聲。水鷄

秋草花中第一妍。早晨清露浴紅顏。爛斑欲染行人袖。
野迢迢連錦繡間。秋花

郊坰渺渺接秋空。滿路芒花一望中。作意招人多少態。宛然瑤袖動西風。尾花

嶺風吹葉落龍河。水面漂紅漠漠多。莫放行人輕試渡。錦紋分裂一條波。紅葉

海烟籠月白荏綃。千百成群數處飄。一夜嘈嘈逐潮信。忽然如近又如遙。千鳥

山巒複沓路回縈。旅客將迷遠近程。何物老禽時喚子。白雲深處兩三聲。喚子鳥

秋柳

老來猶取此情柔。舞著西風不肯休。黛盡何堪臨止水。

條殘無力繫行舟。魂消細雨長堤夕。望冷孤烟遠戍秋。菀彼于今真一夢。寒鴟叫斷故梢頭。

歸雁

年年底事背烟華。努力翻飛去路賒。片影高摩春海月。斷行遙沒暮山霞。寒來暑往長為客。地北天南不定家。寄語湘江秋色夕。扁舟相待宿蘆花。

閑中富貴。次原潛玉韻。

此身何更羨樞銓。主會江山別有權。養老杯樽饒美祿。傳家筆硯足良田。庭留竹影晴敷玉。窗引松聲夜奏絃。一枕猶能稱太守。撫臨槐國幾多年。

將發江都口占

清世徒過七尺軀。流年荏苒奈頭顱。中心為費般般慮。可老山林老道途。

過宮根關作

書劍飄然千里還。未知埋骨是何山。誰憐當日棄繻志。零落空過函谷關。

尾州沓掛訪伊藤民卿

雲樹魂飛已十春。交情未訂舊雷陳。田園有樂憐君逸。筆硯無功笑我貧。賦命奇窮違世俗。素心乖忤恥姻親。漫然走遍東西路。更說平生向幾人。

歸鄉有感

電瞥忽忽一十霜。眼驚塵世小滄桑。金蘭簿上人多鬼。歷吊新阡淚滿裳。

將發鄉口占二首

此行自飛加二越。歷奧州而入江都。著北道游簿二卷。以紀游迹之概。又得詩七十首。游簿既刊行。今乃鈔出詩若干首。

掃展先塋住數旬。貂裘敝盡帶緇塵。十年未遂平生志。跼踖乾坤奈此身。

東奔西走幾冬春。久慣浮萍斷梗身。負郭無田歸亦客。不妨重作遠遊人。

上內贈村瀨士錦

赭圻蒼壁鬱成環。中有騷人掩草關。日夕唯親賢聖籍。匹如蘓子在眉山。

發上內途上作

野濶天低眼界寬。涼風吹袂稻花間。遙林缺處青螺湧。是我明朝鞋底山。

飛州山路所見

白雲如縷起山根。頃刻成層一色昏。路與溪流離又合。潺湲聲裡兩三村。

高山

四塞天然險。中間一境開。市多殷富戶。山出偉雄材。積

翠連空嶺。紛紅滿陌埃。熟看風土阜。疑是蜀都來。飛州

地。四繚皆山。而中有高山。人烟繁沃。猶蜀之有成都。故云。

過少林寺橋

少林寺廢在何年。遺址茫茫墾作田。唯一橋長不壞。依然虹影俯清川。

白糸瀑

巖端直掛水晶簾。霧雨紛飛草樹沾。一境淒然難久立。更疑冰縷結人髯。

荒木川上謁河伯宮

人家錯落樹參差。灑灑鳴湍到處隨。忽得幽寒竒古境。

石欄茅棟水神祠。

藤橋架高原川。長三十六丈。濶三尺。不用一椽。與吳船錄所載繩橋相類。險甚。余不能度。

藤橋一帶半空橫。曳曳搖風見亦驚。何用冒行拚性命。幡然回踵就迂程。

斫石

荆榛漠漠欲齊腰。斫石疏開路一條。竟日蒙茸行不盡。逢人但有兩三樵。

籠渡在飛越二州之界。設於牛崎河上。其制立巨木。且以大繩。長十六七丈。盛人於藤蔓籠以駕之。

兩岸有人相汲引。使之游動往來。詳載余所著游簿中。

奇巧載人藤蔓籠。長繩游引駕虛空。飄飄身似搏風鳥。絕險飛過一瞬中。

富山客舍。圖立山之游。主人云。此山八月以後。風電時發。變不可測。故香火於嶽靈者。以七月中為限。其餘則廟祝要人於路。深誠濫陟。余為之惘然。乃賦此志憾。

夫却名山登陟期。還將勝具付徒為。此間情味人知否。略似科場落第時。

富山訪加藤士武既而大野子文來會

憶昨江都別何圖此地逢故人滄海意游子斷蓬蹤屋引清渠水庭栽偃蓋松一樽談舊事頓緩客愁濃

神通川浮梁

渺彼神通川回流富山郭一望無涯涘勢與海相若浮梁百有餘栉比相連絡缺索結其端首尾要堅確坦然方板上雙脚可以託涉此大川險人人忘驚愕或值霖潦來中斷疏黃濁水退還縫合開闔從所索便哉此施設用意信超卓不須舟楫勞何況橋杠作誰做社征南創議效才略千秋惠行旅其利亦浩博

踰栗柯嶺有懷木曾宣公

栗柯之嶺何綿延劃分加越二州天群山附麗不知數一橫一豎斷還連傍有窈然無底谷峻磴直自中天懸一夫當路萬夫却此是人間虎豹關憶昔宣公起科野欲殲平氏答皇宣兵威稍振旬月內著鞭最在諸源先飛報忽達八條第攪破榮華二十年討禦初選二統袴俄取弓刀晉管絃兩軍相逢即此地白旆紅旗紛滿山羸羊見虎氣先奪低頭躑躅不能前况公禱勝埴生廟精爽所注金鍊堅明神默佑人力外勝機一發如決

川宣公謁埴生八幡祠祈戰勝進願書一通大夫坊覺明所筆至今歲在廟祝上田氏數萬行兵

一時沒坑谷皆為僵屍填。風鶴亦疑敵軍至。餘兵潰散
向京還。沿道待公爭降附。入京軍騎簇雲烟。平氏束手
無一策。闔族爭赴西海船。天顏有喜恩綸重。典廐
之官辱清班。勢如朝日從東出。嘖嘖英名天下傳。豈料
建儲議一梗。爾後所為皆冥頑。誤落鬼武雄猜設。忽焉
敗滅粟津田。宣公奏請立北陸宮為太子。呼噉何前日
法皇不可公之失志由此。之恭順而後爾悖。無乃不諳朝典之故使_中之然。指斥其
為雖有罪。其心直贛真堪憐。倘使公能終晚節。千歲英
豪誰比肩。任意悍然伸不屈。殊勲反被眾人捐。他日鬼
武削平業。莫公餘力此之緣。一源分派榮枯異。鎌山獨

檀追捕權。可見天道好還理。彼家三世亦傾顛。况其同
氣當身滅。公目乃可瞑九泉。我昔經公殞命處。追究情
事留餘潛。今日來公策勲地。欽慕英風感慨牽。罪魁功
首一人迹。遺真流芳千古編。為公激昂為公惜。悲風肅
殺吹人顏。六百星霜歲運迅。栗柯陵谷未全遷。當時殊
績宛在眼。恍想英魂住此間。

金澤城下作

人殷物阜小關東。大國儼然別一風。市井縱橫分局面。
城樓壯固見神工。魚鹽自擅三州利。富强須推四海雄。
憶得土師遺德遠。千秋瞻仰感何窮。

金澤訪毛受伯龜

別來容易換光陰。會晤無違慰此心。記得芹宮同學日。茶談動是到宵深。

不知親

隋岸逶迤十餘里。如屏如壁後先峙。其下正當潮汐衝。一路直通砂磧裡。若值陰風捲海瀾。騰藍沸白勢漫漫。沙路沒在深洋底。數日浸淫不敢乾。行人到此誰無懼。疾步如飛各爭路。不然瞬間分死生。父子之親不能顧。我來乃發惕然思。身體猶係父母遺。悔為千里漫遊客。况背聖言冒至危。此險久聞北人說。竊笑浮談多失實。

即今何啻驗其真。他時思到亦慄慄。因憶紛紛行旅人。誰非父母鞠育身。緣此若能生孝感。非不知親實知親。臨危反本乃天性。竟至愛身加肅敬。果然人子皆如此。幡然將履坦途正。君子回車勝母閭。祥鸞豈向曲木居。此地獨負不祥目。為之喟然又大吁。

能生驛海望太壯

狠石峩峩莅海隈。白山祠外望雄哉。狂瀾震盪撼天地。勢挾百千雷鼓來。

桃川望佐渡於隔海

原二錄一

老奸當國勢如龍。絕海遙留玉輦蹤。昔日昇僊何處是。

接天烟浪恨重重。

詠承久時事

林泉寺拜瞻上杉霜臺公遺像。遂登春日山古墟。
我來北州地。追撫杉家事。欲登春日山。先訪林泉寺。古
塑儼存霜臺真。彫劂精緻無等倫。凜然英表不可襲。電
目炯炯來射人。憶公夙歲修淨律。涵養兵機亦專壹。縱
橫竒正神理存。百伐千攻無一失。三越披靡一劍風。八
州殆入指麾中。雄威一世有誰敵。峽兵往往避其鋒。遺
法至今天下遍。兵家講述要習慣。志士誰无忻慕心。况
拜其真識其面。回踵遂到山中墟。幽蹊埋沒入榛蕪。金
湯形勝今何有。寂莫徒為狐兔居。故物唯留甃井在。鏡

光寒碧尚清泚。豈知城邑變遷餘。一水湛然長不改。低
回顧眄難為懷。感激情極生悲哀。陰風暮送颯然雨。更
疑餘叱動山來。

福島古城址

山河不改舊封疆。世運推移易主忙。為問荒川一條水。
古來看得幾興亡。

荒川古昔應化橋所架在福島傍近。

長濱道中

海涯無際白茫茫。不見人烟倦路長。沒脚炎沙深一尺。
苦程何啻涉羊腸。

有間川

蟹戶荒涼海驛烟。數聲螺吹集漁船。人人各自携罾去。門外波濤便是田。

自長岡買舟下科野川

晨星歷落渺晴霄。宿霧初收兩岸遙。帆腹孕風波浪順。載人殘夢向三條。

新瀉

漲碧氤氳萬竈烟。豪華獨擅北甌天。八千溪水歸滄海。新瀉。八千。八十橋。梁架市廛。地有七橋。繁曲沸樓紛不。溪水所歸注。斷宿檣交港。蠹相連。竹枝誰繼劉郎詠。漫採風謠綴作篇。

新瀉見卷菱湖翁。余今夏與菱湖相別於江都。不意相逢于此。同飲市樓。

天涯邂逅見張顛。聯袂同登綺陌筵。一夕風流它日話。合歡花下小遊仙。

寶川道中

老木樓雲白日陰。山深自是絕鳴禽。溪流一道淙淙響。似聽咸英太古音。

望磐梯山

東天一角彩雲間。仰見丹梯百仞山。氣象儼然何所似。端人挾笏立朝班。

東松嶺

古松如束碧森森。庇得秋陽蓋影深。好是行人休頓處。清風滿地路傍陰。

稚松城東浴天寧溫泉

靈泉一瀑蕩疲瘵。竒效何唯服九還。明發好乘豪氣去。朗吟飛過數重山。

白川

秋風一夕冷征顏。迅景偏驚客路間。京洛綠陰如昨日。紛紛紅葉白川關。

旅中襍詠錄原三

客舍挑燈坐感眉。追思往事欲眠遲。秋風曠野孤行日。夜雨長江獨泊時。九月單衫愁露冷。十年征鬢怯霜欺。越聲莊舄無人顧。一片情懷說向誰。北游詩止此

題陳希夷長睡圖

一卧雲臺五十年。居然別占睡鄉天。紛紛世上兵戈響。不到先生耳孔邊。

有年

順風時雨遍郊吟。秋穀登場寶粒新。千里歛雲黃蕩蕩。萬家炊玉白勻勻。輪租不待誅求吏。賽社方饒醉飽人。閭里俄然成厚俗。爭頒餘蓄賑孤貧。

咏松

不待秦皇寵命隆。天然貴爵木中公。昂昂獨抗千秋節。
檜栢低頭拜下風。

咏竹

玉立數竿幽澗濱。帶烟橫月倍精神。林下古來常主少。
與君耐久有何人。

咏落花

原三十
錄二十

韶景匆忙水向東。枝頭無復了遺紅。驕蹄觀彩風中路。
倦翅粘香雨後叢。孤枕酒醒春夢短。高樓燭盡夜游空。
憑誰寫得綿綿恨。萬緒千端說不窮。

有脚陽春去作空。周蹄難逐八荒中。五更燈火長門雨。
一縷茶烟禪榻風。流水漾愁穿巷陌。夕陽移恨上簾櫳。
都將夜夜相思切。付與啼鶯滴血紅。

爛向春風被一時。別君身世似懸旗。鳥啼白日簾櫳靜。
人散黃昏簪珥遺。愁縷結腸紛不解。艷容遮眼恍相隨。
可憐綠薄乖初願。衰髮蕭蕭杜牧之。

寂莫繁華轉眄渝。忽忽西兔又東烏。腸雖鍊石誰無感。
花與塵埃共一途。酒旆徐飄春市悄。鐘聲空度暮山孤。
芳魂止竟歸何處。只有流鶯盡意呼。

江堤十里煖烟迷。千樹花飛面面齊。風意狂時隨上下。

波流回處共東西。林亭雨暗棋聲杳。野店春殘酒價低。
最是行人腸欲斷。黃陵廟古鷓鴣啼。

花事闌珊易夕曛。五分春色減三分。池中湧白魚吹雪。
空裡飄紅燕蹴雲。世上從今消畫景。人間無處不愁氛。
牋天若了平生願。勒住風光壽萬分。

東欄醉夢霎時間。九十青陽棄我還。節序往來雙轉轂。
人生歌哭一回環。游絲弄片春風慢。細草籠香夜雨閑。
自古繁華能有幾。莫將天意作深慳。

滿城愁景杜鵑天。回首春風怨淺緣。平地錦波塞可涉。
一庭紅褥藉堪眠。多情只待飄琴上。薄命尤悲墜溷邊。

此意此時誰與語。茶杯詩卷日如年。

顏色曾占絕代妍。不堪泥土泥芳銘。艷陽欺我無多日。
清賞從今又一年。萬瓦彩鱗風外寺。滿蓬紅雪雨中船。
此間只合昏昏睡。翹首何邊不黯然。

幽慵何以度流年。芳意消沈事可憐。風急或交楊絮落。
雨淋纔貼薜衣鮮。虞兮有恨軍中舞。白也無醒市上眠。
商筭古今同一嘆。援毫空賦餞春篇。

人間到處總蕭然。百計無由慰眼前。好事多妨雲礙月。
良辰易失箭離弦。情如斷夢難重續。迹似寒灰不再燃。
自笑身非江上客。罵風嗔雨過年年。

夢中歡樂且休誇。老景難留下坂車。天地頓成無味節。
乾坤誰免失聲嗟。穿山旅客衣棲雪。汲澗禪僧舌泛霞。
安借魯陽戈一柄。為君麾得夕陽斜。

品紫評紅屬渺茫。三春遊戲小滄桑。仰天只嘆風心惡。
顧我同憐蝶意狂。九陌無人歌窈窕。連宵有夢遠高唐。
為君聊設平生奠。泣向階前炷瓣香。

捲盡湘簾坐夕陽。臨風小酌餞東皇。浮生觸處無諧意。
芳景消時最斷腸。燕觜爭紅春運滑。牛蹄踏紫暮堤長。
游衫未忍和灰洗。雙袖曾籠灑歛香。

花比蜉蝣命亦輕。忽為香屑自難撐。溪聲帶恨春如咽。

日色含愁晝不明。階下蟻行平涉彩。浪間魚尾盡成頽。
爾來嗟我無豪興。太似英雄腓肉生。

黯紫瘦紅到處稠。老春雖在悄於秋。悠揚有態因風起。
漂泊無踪與水流。詩伴不來僧掩寺。醉人皆去鳥窺樓。
追思一刻千金賞。月照空梢夜夜愁。

青帝回鑣不可留。盛時芳興共悠悠。人生百歲風中燭。
花命三春水上漚。紅雨有痕深巷冷。彩雲無影畫欄幽。
終天極地情難盡。卧聽金鈴響枕頭。

出門何處慰雙眸。滿面風花爛不收。玉樹歌殘陳國恨。
返魂香咽漢宮愁。群禽聚啄糝紋逕。千耦平耕雪色疇。

昨日歡游如隔世。一匝香篆掩簾鉤。

東風何事負初心。吹落紅芳蔽地深。渭水漲脂春渺渺。馬嵬埋玉晝沈沈。無情人尚彈雙淚。有術誰能繫寸陰。忍問向來歌舞處。鳥聲如哭遠空林。

乍煖乍寒晴又陰。青春告謝去駸駸。壚頭削迹豪游客。葉底停歌巧轉禽。殘景管情嫌晝永。暗愁妨睡怯宵深。慙慙休把恩讐訴。千古東風兩樣心。

發江都口占

此行游與之松島金華山而往來異途。著游與志二卷。又得詩六十餘首。

今乃鈔出二十餘首。

半肩行李發江城。遙指東甌萬里程。斗米久拋身上累。

名山將踐夢中盟。神駒伏櫪蹄長屈。野鶴辭樊翮始輕。前路願逢松島月。一槎凌浪泝空明。

木卸買舟下利根川

買艇東寧河。悠悠江路賒。解纜東南走。岸濶似無涯。汀禽驚艣去。拍拍舞蒹葭。林巒互迎送。畫景傍人多。暝烟生遠浦。何處起漁歌。江面無所見。暮色蒼然加。忽逢急雨至。蓬底避滂沱。不知其所往。一夕但從波。

舟抵神崎二首

神崎祠下小屋區。繫艇來登賣酒壚。自是江鄉多別致。數家馴養鷺鷥雛。

千年古木廟孺頭。老大何唯蔽數牛。赫赫炎陽來不透。
綠陰占斷一鄉秋。

香取

朱髯漫漶古祠宮。巫史衣涼曉露中。報道新嘗祭儀近。
數竿幢影一林風。

利根川新田。畫在水中。早稻皆熟。村人泛舟獲之。
垂穎如雲。滿目黃。新畝畫在水中央。村人赴業舟為脚。
札札鎌聲響夕陽。

潮來二首

十二橋連水竹隈。舟程盡處是潮來。誰知漠漠蒹蘆地。

中有菖蒲帶媚開。

綺樓臨水沸絃歌。是處消金別一窩。阻得行人留數日。
非關江上有風波。

鹿島

松林鬱鬱鹿呦呦。滿路紛呶賽客稠。邦國古來加肅敬。
此神威武照千秋。

上世神威遍九垓。餘靈永救萬民災。誰知一箇祠頭石。
鎮壓蜻洲大地來。

水戶城下作

累世生賢主。他邦屬望深。右文遵祖訓。崇儉淑人心。野

有桑麻富。街無鄭衛音。小儒來問俗。感觸欲沾襟。

西山觀 義公兜裘遺迹。竦然感賦。

德業烜煌一世明。決然高踏避榮名。修文偃武開邦化。釣月耕雲寄老情。宗室勲庸周召伯。親藩標準漢東平。紛紛旅客皆加敬。纔望西山下馬行。

至神岡。土人嘖嘖說平瀉之勝。乃枉路一過。果不爽所聞。賦此志喜。

常輿之間曰平瀉。地勢蜿蜒連海壁。側身劣入洞門來。中有一境通阡陌。居民大抵襍漁農。家家晒網掛籬柵。行至東南一角隅。特起樓臺待行客。前有回灣似缺開。

潮水吐吞迸紺碧。幅員所及極宏寬。帆檣來係數州船。亂松絡岸森相連。姿態橫生如陸戟。佛樓神宇棲其間。一帶鹵烟拖練白。暮景殊添一段清。明月有情來照席。銀濤萬頃坐邊生。海色玲瓏不知極。自喜在路不多程。得此恍然圖畫域。回頭世事徒紛紛。何若漫游情所適。漁艖歸來魚潑刺。且喚數杯潤喉嗑。洒然一條修途勞。不眠遂復移更刻。由來此景天下稀。惜在遐荒人未識。醉裡題詩述其由。欲啓後來游客迹。

黑浦以東塩田相望

茫茫白鹵海灣長。中有塩田井畫場。憫殺醜丁千萬苦。

顰顏如漆晒秋陽。

磐城訪松本土賢

乖違已是十春秋。君在官途我薄遊。今日更從何事說。舊思如蝟集心頭。

仙臺謁大槻平泉先生

數年湖海記芳名。仰見高標照座清。滿腹經綸皆著實。等身述作盡純精。官攀衛率參從政。家住芹宮任育英。堂名育英天下耆儒今有幾。逢君不覺寸心傾。

瑞鳳寺訪古梁禪師

幸是良緣到上方。逍遙參得遠公房。無窮義理談如湧。

特絕文詞筆亦香。各地難期他日會。歡情兼與別愁長。歸來每值秋風起。悵望東天雁幾行。

過宮城野

昔年誰是築宮城。遺迹荒涼唯有名。滿野西風秋寂莫。胡枝花老草蟲鳴。

題櫻田丸德聚勝園

名墅由来罕匹儔。入門先覺此心幽。宮城野古蟲啼月。源將營空雁叫秋。有八幡公壘址松島近連園一角。金華高插屋東頭。喜君留客分清福。勝景般般聚寸眸。

千賀浦

籬笆一島最嬋媛。曾記伶家曲裡言。緬想風流源左相。
摸將畫景置家園。

松島舟中

石身松髮畫中姿。幅幅蓬瀛逐棹移。妙景由來誰讚得。
不須騷客費多辭。

御島

橋似彩虹通島嶼。松如青蓋亞淪漪。此中何物裝名境。
唯有寧公七尺碑。

富山

松島之景在富山。我聞此語思一攀。十折九盤寧道險。

著力得陟最高巔。雲表一字大仰寺。寶地莊嚴非人寰。

小僧揖客勞遠訪。接衣迎入紫雲關。門扁紫雲關三字關外喬

木皆斬伐。無復一物礙眼前。恰逢澄霽天如拭。蒼波激

灑浸崎灣。幾多島嶼悉現出。繡崖丹壁不知負。晴曦晃

耀射其上。霞光浮動助爛斑。譬之漢殿三千女。各出洞

闈爭花顏。又似玄圃群仙子。星冠雲佩立其班。聖者黜

者磨琢者。如蹲如坐又如騫。散為棋子聚為繭。忽而缺

斷忽環連。殊形詭狀千萬出。盡似向我呈餘妍。世間何

樂能如此。不啻百城南面權。嗚呼二儀開判世。孰造此

境置人間。歷落布置安排妙。若猜神斧窮雕鐫。丹青縱

有摩詰技。難描全景。上縑箋。文章自匪柳州筆。能記萬
一入詞篇。天下隨處名勝在。烟嵐各擅一方偏。一自杖
鞋經此境。誰張脣吻說山川。安得身生垂天翼。挾持此
景向西還。不然更學壺公術。縮取茲觀供坐邊。彼此般
般費思想。天風吹袂颯翩翩。神凝形釋倚空立。直訝羽
化去登仙。

金華山

一柱巍然鎮大東。遺基留得古琳宮。三千世界微茫外。
十二樓臺縹緲中。山帶金精長自潤。天連鵬際杳无窮。
飄飄自有凌空想。龍女祠頭萬里風。

發仙臺景田可久送至郭門外敘別

不是秦胡水隔程。臨歧何用淚雙傾。江都自有前期在。
他日將論未了情。

瀨上驛

山程北望羽州賒。古驛蕭蕭十數家。略見鄉風同嶺表。

店頭留客賣茅蝦。茅蝦見嶺表錄異

恭拜晃山 閔宮

瑞靄氛氳護 閔宮。山圍水匝地。形雄。垂仁不讓周文
化。撥亂何唯藻祖功。異域聞風多貢獻。群公效節盡朝
同。從知大德膺天命。國祚綿綿豈有窮。

大堤村謁熊澤蕃山之墓

先生天質已迥異。加以學問成大器。風雲際會芳烈公。及時乃得行其志。明哲相逢曠古稀。君臣戮力秉樞機。更張藩政一歸正。蔚然治績遍黃薇。四隣聞風多倣效。往往衣被先生教。歷歷當年經國圖。條理秩然存實效。誰圖晚節牽物論。畢生功業落幽寃。寄託他藩終厥世。羈馭留得大堤村。先生夙昔工夫素。以致良知為專務。志先經濟後文詞。何況區區守章句。學術所由別一途。淵源已異我程朱。得力由來亦在此。莫將同異蔑先儒。後生動輒加非駁。何異蚊蠱撼山嶽。若能虛懷綜遺行。

何物崛彊終不服。東游適過古河城。數里枉程問墳塋。殘碑獨立宿草底。無復一人供瓣香。忻慕高風心自醉。不覺潛焉洒雙淚。秋風颯颯動松楸。回首西山日將墜。憮然自恨我生遲。不與先生同此時。謹述哀些表寸悃。泉下之靈知不知。東游詩止此

松聲

宮商一曲入空傳。細聽非關管與絃。忽似波濤來捲地。又如環佩去朝天。山人夢斷紅塵外。野雀巢寒皎月前。最是清宵堪愛處。茗爐相和鼎吹烟。

櫻

百花叢裡獨分明。何物芬菲敢抗衡。緇色深春隨晏駕。
用深草芳齡延日伴朝纓。用櫻町中肌膚賽玉温温軟。
陵事態度欺雲綽綽清。一笑西人眼中狹。漫教姚魏竊虛名。
春日望富嶽

雁外新晴旭影紅。三峰映發白玲瓏。貝宮珠闕天仙宅。
總在春雲五彩中。

同一齋佐藤先生。陪冠山老侯鱣臯隱栖。分得尤
松門咫尺對西疇。招隱知君卜宅幽。水樹環園憐世遠。
園號風烟入座任人收。乾樽酒冽無辭醉。玉麈談清不
環水著愁。自是追隨參妙理。此心何啻泛虛舟。

歸仕 本藩志喜

多年棄放罪猶輕。恩聘何思再策名。不啻朝饑逢美飯。
略同枯骨得重生。甄收已被非常寵。報效須圖一片誠。
喜極還牽風樹感。令人轉憶仲由情。

題源將軍勿來關咏落花圖

白旄遙指海雲東。前後三年策偉功。片事猶颺千歲馥。
古關橫槩落花風。

荷錢

何人傾產撒池塘。買斷薰風四月涼。魚蟹定誇身世富。
鷺鷥應貼羽毛香。圓鎔殆奪官真巧。貫朽誰窺水府藏。

止竟紛敷無所用。願移貧土濟流亡。

科斗

古渠春水正分形。漆黑團團幾箇星。唯怪尾長如曳帶。又驚頭大類橫丁。千群有喜連朝雨。一化無違半夜霆。上世遺文留在此。依稀欲補聖人經。

新築書事

東托西依已十年。即今初締小茅椽。窗前自植新修竹。架上先排舊蠹編。半畝猶知容膝易。一杯時寄曲肱眠。此間還愛坊廛遠。不放淫哇到耳邊。

高槐侯世子徵讓。有講書之囑。賦此以呈左右。

寒酸誰計入清評。忽接恩招意自驚。但為高明收衆聽。敢辭分寸效愚誠。五車養志常忘病。世子多病。父廢朝謁。二善修身不要名。卜得雷封親政日。亦應膏澤潤黎氓。

穀日櫪宇林公。翡翠軒席上。分賦春風扇。微和六韻。

蕩蕩旋元化。融融轉大鈞。截寒梅欲笑。吹煖柳舒顰。蝶舞當階亂。鶯歌出谷新。靄晴山現黛。冰泮水生鱗。已動紅樓帳。還揚紫陌塵。方欣播遠邇。發育等堯仁。

置爐養梅二首

楮袖烟熏燠景多。間功別貯小陽和。一盆生意洋洋在。

雪虐風饕奈汝何。

愛護盆梅似子孫。數宵輸與一爐溫。春機遍動枝南北。不假東風半點恩。

畫竹二首

壁間寒玉膩於油。坐卧相看覺意幽。它日釣舟歸隱後。與君同占一溪秋。

霜銷一幅碧森森。筆下含風意匠深。展向空齋傾耳坐。如聞鳳唱與龍吟。

春烟

淡抹輕粧晴尚敷。遠看如有近如無。鶯聲不隔春將曙。

燕影才分日過晡。傍水深籠橋北寺。帶風高颺竹西墟。此中含得熙和象。添出昇平一幅圖。

陪程宇林公游谷口別墅賞海棠花分得麻

不寒又不熱。天候弄春和。吾師試杖屨。同來賞歲華。百花開谷口。姿態各相誇。海棠尤爛熳。經雨著嬌葩。連如錦步障。散似赤城霞。絳霰因風起。紅雲映日加。對此畫中景。豈可等閒過。詩情動胸臆。微吟手暫叉。却憶少陵老。當日避名花。我生何為者。其如僭越何。

春晚

烟籠春樹定栖鴉。昏景蒼蒼逼碧紗。仍看一方牆角白。

夕陽留影在梨花。

春牛

雨餘春草正埋蹄。睡足烟郊日欲西。一路慣歸人不管。悠悠踏過落花堤。

春睡

南華讀罷日如年。一枕逍遙任意眠。夢裡不知身是我。栩栩然為蝶舞花前。

咏菊奉祝一關侯太夫人五十誕辰

數枝霜蓋照東籬。冷艷寒香獨傲時。風度若將入世比。藐姑山頂綽然姿。

秋琴

一天灑氣入鳴琴。商律先飛指下音。松籟起空秋颯颯。溪泉咽石夜沈沈。清徽高映寒星影。素調時和別鶴吟。自是悲愁無著處。伴他閑抱古人心。

秋帝

雍熙村落歲豐天。幅幅高飄數處懸。熟眼不迷楓葉渡。舊游猶記杏花塵。何曾有手能招客。本自無聲亦喚船。為問三秋方九十。留人賺得幾閒錢。

水藩老臣藤田君樓在江汜。冬議公見臨。賜國歌一章。君賦詩謝恩。乃次其韵以贈。

一夕邀高駕。高樓洗俗魔。德同晴夜月。恩比碧洋波。百
世風雲會。千春徵角歌。噴然傳盛躅。欽慕士林多。

牛盞行

露下深林氣。淒絕赤跣穿。未足將裂。有物黝然當道橫。
咒詞先向祠前謁。三枝絳蠟頭上燃。如火炎炎煽餘烈。
狂夫心竅擬則是。蒼杉椽得五寸缺。一念所注豈無通。
樹身淋漓迸赤血。殘夜陰風吹月斜。鬢髮毛髮亂於麻。
誰知現在夜叉相。昨日芙蓉帳裡花。

李白圖

高情豈污永玉璘。疑似難明負物論。千古快心蘓玉局。

幹將大筆洗君冤。

杜甫圖

品流優入屈陶間。千古併君鼎峙傳。一片誠忠經國志。
長留光燄在詩篇。

寒村梅綻

寺北橋西路幾環。數株清絕枕溪灣。平欺積雪層冰裡。
亂插青松翠竹間。沍景籠香鶯未識。夕陽橫影雀初還。
塵襟欲續孤山詠。恐被花神笑厚顏。

盆梅

自藉栽培力。非關雨露私。衆芳猶未動。孤幹獨先知。書

愧籠香淨。吟燈弄影奇。淡交唯有汝。憐與我生期。

詠溫石

一片平於掌。回春把握中。誰知膏確質。更策溫柔功。雪
夜身如醉。霜晨夢欲融。若生封爵議。三品自歸公。

題美人卧病圖二首

柔紅一線枕痕新。鴛被香消委暗塵。領袖不乾長夜雨。
絃歌空背百花春。環寬五指殘蔥細。黛盡雙尖老柳顰。
最是關心今與昨。鵲聲喧傍翠樓頻。

綺羅憂苦有誰知。積作深痾命若絲。午日窺簾羞照影。
春風拂檻怯侵肌。雙鬟綠脫雲無態。兩臉紅消玉帶疵。

身後願留墳上柳。年年情縷向郎垂。

富嶽圖

昨夜天仙此聚班。宴終皆駕鳳驂還。猶留一片瑤杯在。
倒掛南箕北斗間。

奉祝仙臺宗室石川君舉男

吉卜方逢震。歡聲滿畫堂。芳蘭新拆甲。奇璞始生光。柱
石門風盛。山川祖澤長。遙思英物表。誰是試嗶嗶。

秋元厚載春星堂席上咏隣家花分得麻

半是如雲半是霞。湘簾小捲眼無遮。清香不隔踰垣至。
嬌影相連跨屋斜。並境同成多日賞。一株分屬兩家花。

世間春色誰為主。笑向來賓亦自誇。

東台大慈院盛集賞牡丹。次養玉院主韻。

滿山新綠已交加。獨駐韶光在梵家。杯酒共追方外賞。管絃寧慕世間奢。微風入座香如麝。落日穿園彩奪霞。歲歲芳筵留藻詠。毫端誰是最生花。

送山田士栗省親唐津城

旅裝辭去路悠悠。短堠長亭跨卅州。絕海波濤生枕上。連山花木映鞍頭。趨庭自敘天倫樂。列籍新逢主寵優。不似出關蘓季子。依然空著黑貂裘。

咏隣家竹

出籬修竹兩三竿。日揭簾幃坐上看。幸使吾廬長免俗。綠雲分影到檐端。

題漁樂圖

晴風吹碧水。新漲正瀾瀾。漁扉映楊柳。倒影落淪漪。罷釣暮歸去。藍底躍銀匙。家人買酒待。酣飲暢身肢。長安塵漠漠。富貴多憂危。豈若百年際。蓑笠托生涯。突彼渭濱叟。翻榮帝者師。可憐江上鳥。千古背人飛。

凶荒

官廳牒訴事紛紛。棄子拋妻日夕聞。人世若無朝夕計。如何不落虎狼群。

市廛廬井共蕭然。大半流離欲絕烟。老弱多為溝壑瘠。
徒留浮屍飽烏鳶。
各國飛書告歲荒。遠阨情事最心傷。謀生路絕無人理。
道殣皆為在在糧。
縣官日日賜錢糧。老稚相扶赴大倉。仰見清時饒雨露。
一垂嘉惠濟流亡。

松間月

松間獨步踏蒼苔。月照高梢雀夢回。重影滿身何所似。
夜叉蓬髮逼人來。

中秋後二夕。梅簷依田公玉壺樓席上用陳簡齋

秋夜韻同賦

傑閣捲湘簾。無復飛蚊集。天風吹月來。清景涼如濕。百
年能幾時。鼎鼎水流急。只合攬暉游。對酒忘於邑。夜靜
桂香浮。霏霏侵席入。如坐廣寒宮。暫此脫塵繫。

踏藕

世計無安逸。深泥執業忙。一身穿坎窞。終日在池潢。久
雨愁陰潦。寒風怯夕陽。誰知漁釣外。亦托水雲鄉。

雪龕誦經圖

空山一夜雪紛紛。老衲閑繙貝葉文。戶外松杉皆變態。
但疑羣鬼繞龕聞。

雪屋求句圖

兩肩山立意如何。欲向龍公奏郢歌。一任他人疑凍死。詩家樂地此中多。

春雪用韓文公韻

白雪無雙景。陽春第一謠。韶光沈不動。寒力凜難消。皓艷欺宮額。輕姿妬楚腰。千家銀作屋。萬樹玉為條。曲巷纔分逕。深溪半沒橋。飲徒情可樂。高士興將搖。瑞色連天地。歡聲湧市朝。驚危交跡走。凍雀喚群飄。遠沼開明鏡。遙岑襯素綃。眼前詩料富。佳句屬誰饒。

侍

本藩世子講筵。既而割園池所獲魚賜宴。即

賦

高明側席待微臣。素有鮮鱗寵渥新。未盡數杯身骨煖。恩輝一片藹於春。

陪藕黃林公清集。分得尤。

水曲林坳地勢幽。名園佳會絕塵咻。榴紅竹綠深相映。鶯語鶻聲互欲酬。玉麈生風談娓娓。彩毫裁綺興悠悠。何人今夜窺天象。定道文星聚此樓。

題溪山春雨圖

以下三首。應飯田侯世子囑。

春雲如懶雨如癡。晝暗山中不記時。咫尺吟音問絕。溪橋漂去水瀟瀟。

題楠公讀讖文圖

托依虛讖亦忠純。欲鼓三軍討賊臣。嘆息南風終不競。
東魚吞海却成真。

秋夕雨晴

一天如洗滌瑠璃。風捲殘雲陣陣吹。梧葉已零宜見月。
輕陰無復碍窗枝。

將省墓美濃發江都口占

君恩收拾道途身。掃墓將酬地下親。辛苦十年纔報志。
此行初放兩眉顰。

福島訪武井禮甫

出盡岨關夕照斜。尚侵昏黑叩君家。樓收翠黛千山秀。
架插圖書數軸牙。蕎麵出甑秋味雋。草花堆案露香誇。
且緣諸彦同杯酌。坐到青燈落燼加。

還鄉

不肖甫七歲。先子歸道山。狎愛覓梨栗。彷彿記音顏。同
胞唯有姊。共依阿母前。家資既盪盡。竈下欲無烟。阿母
萬勞劬。鞠養極憂煎。夜績煩織手。二兒蒙保全。姊長為
擇配。早嫁得良緣。督我無所夕。一意執簡編。我亦知所
嚮。慈訓銘心堅。自期成立後。反哺盡甘蠲。老齡不可恃。
落日逼虞淵。我年方十六。棄我赴重泉。嗟我若為者。顧

影獨淒然。親戚多反目。孤了誰復憐。激發四方志。負笈就時賢。箕裘付一擲。萍蹤處處遷。爾來十餘歲。所執業則專。不材雖不就。師友共周旋。再仕桑梓國。况獲充儒員。自料何所得。叨居諸臣先。不有餘慶在。殆為人所捐。欲以報之德。罔極是蒼天。戊戌歲秋日。告假向鄉還。還鄉姊已歿。誰與說當年。獨來雙墓下。拜跪淚漣漣。筠筒盛新水。插得秋花鮮。薄奠從邦俗。觴俎借僧筵。所冀格先魄。孝思達微涓。秋色方慘澹。葉響西風懸。賦詩擄情愴。自擬寒菽篇。

井上氏招飲

細細傳危到夕曛。交情二世比蘭薰。廿年父執皆凋謝。一點殘星獨有君。

松波大本晚翠館招集

故園弛擔不多時。先赴騷人雅素期。家釀香浮秋菊味。松波氏庭松影合老龍枝。園有大松。故館號晚翠。看君製美酒。揭祭酒林公所書扁額。濯濯詩如玉。嘆我星星鬢作絲。幸是論交同臭味。欲將廉澤報相知。

藤田子樂。三宅廣業。同德夫。佐藤如玉。相謀邀飲。余於如玉吟松園。

笑話紛紛酒慢巡。相逢總是彼騷人。尤思巨野地同浮。

月。又記清溪地名共下綸。容枕久馳雲樹夢。征衫暫拂道途塵。歡情未洽重催別。爭奈公程限此身。

松本侯先世治加納城時。梁田蛻巖仕為教職。不得志。去事明石侯。其宅址猶存。悵然感賦。

蛻翁居址已荒涼。傑什長傳藝苑芳。尚訝當年遺韻在。松風泉水共鏘鏘。

加納城西清村。當孔道之衝。昔有一大古松。蔭於數畝。行人佇賞。呼曰祖徠松。松本侯先世從加納移封之後。其藩宰某氏之隸。川井次兵衛安重者。咏國歌一章。以述遠想之意。歌詞雋永。辱徹九重。

特加御賞。於是徠松之名。一時噪于世。縉紳諸家。寄詠太多。近歲松經雷火枯死。余幼時聞諸

故老。乃今經其地。不能無感。安重國歌曰。明暮雨。乃人能往來。延。便仁曾幾久。因賦二首。

陪隸雖微藻思濃。幽懷寄向故園松。熏天炙地人何限。誰把風流徹九重。

路傍延佇撫遺蹤。數畝清陰久已空。獨有徠名不朽。至今猶與魯邦同。

岐阜懷古二首

岐山百仞鬱崢嶸。萬古俱高阿吉名。雲氣自留旌旆色。

江流長逆鼓鼙聲。層宮有址寒飈嘯。敗堞無人蔓草生。
追撫英雄創業迹。滿襟悲激淚縱橫。右府公

阿三當日太昏朦。乃祖規模掃迹空。淺計空投奸賊餌。
驕心不諒諫臣忠。人和一失何能立。地勢雖便不足雄。
遙悼紀山秋寂寂。羈魂應泣月明中。三法師

篠山璋峰公子。出嗣同族郡上侯。後讓侍講有年。

賦此恭賀。

經筵啓沃幾冬春。諳得才華絕衆倫。騏驎初馳千里技。
棟宇重合二家親。藩垣報政應無日。廊廟抽身在若人。
等候君心能錄故。猶將寒賤掛餘脣。

題靜妓圖

舞袖淒涼玉殿中。繅絲度曲怨何窮。貞心誓比芳山雪。
不許東風一夕融。

題佐佐木柁原二將菟道河爭先涉圖

鍊騎連鑣蹴碧波。二家殿最果如何。詭言賺友非真勇。
先涉由来不足多。

會津藩丹羽大夫攬勝亭十景賦其五以應需。

玉立磐梯山。仰瞻春靄直。寫出大夫真。和氣溢顏色。磐梯

山春靄

炙脊誰名嶺。翻於秋月宜。舉頭迎素影。涼徹粟吟肌。炙脊

嶺秋月

一色連畦遠。孤村是柳原。捲簾時放眺。流翠到前軒。柳原

畦連

一帶柳橋長。行人絡繹度。亦是小周疆。相逢皆讓路。柳橋

客行

富庶逐年加。人烟漲城市。想君退食餘。遠望有餘喜。城市

烟浮

臘月下旬大雪。同梅檐公和李義山喜雪十韻。

臘雪深盈尺。豐祥信可嘉。灞橋疑柳絮。庾嶺錯梅花。密灑多於雨。回飄亂似麻。玉田千畝地。銀屋滿城家。糝迳

松如顛。橫窗竹欲斜。洞天迎雀駕。宮巷報羊車。郢律誰容和。秦姝詎許誇。通衢迷四達。曲港失三巴。夜興舟楫泛。朝寒酒易賒。此時何默止。援筆頌年華。

畫兔

平原葉盡曉霜多。巧脫罽毼一走過。今日世間陰狡態。與君相比果如何。

盆松

青針數寸已離奇。淺土留根命可知。架棟寧期他日用。拂雲空付別林枝。琴聲不颺羞風度。蓋影微敷怯月窺。只有瓶梅堪舊契。一床同逞歲寒姿。

得齋詩文集卷一
題山水畫幅後。此卷尾州大鐘雨村所藏。密緻精巧。實為絕品。相傳王叔明所造。或然。

天外長風捲雨還。濃蛾洗出數眉山。殘雲稍洩斜陽影。映射林梢一道殷。忽見奔泉懸絕巘。霏霏珠沫灑松巔。分派縈回極姿態。巖根隱見碧潺湲。不知誰向此中住。一籬疎竹護柴關。垂白老人吟隱几。鹿窟相馴亦自然。畫史胸中貯墨海。餘瀆迸落縑素間。縮取江山一何巧。毫端闢出別區寰。嗟我十年混塵土。夢中丘壑阻登攀。偶逢圖畫捲還展。杳然相對悅心顏。世間儻有如此地。卜隣長此共清閒。琴書一擔輕裝具。何待山中故人招。

我歸來篇。

七月既望。與筱山潘金森君子勳。及池田士靖。二木士剛。澤井士美。大道寺淡齋。墨水泛舟。得十二

絕句。錄六

游驩不豫刺前期。偶爾相諧事最奇。况復納涼兼濟勝。一瓜同向水雲涯。

汲取深清手自煎。舷端細細颺茶烟。灣頭幾箇傍觀客。定道舟中有玉川。

維舟暫上岸東頭。亞字欄干俯碧流。盤礴解衣涼徹骨。此心何更讓公侯。

林梢一桁遠霞收。暮景蒼蒼滿目浮。波面忽明紅萬點。星毬齊上去來舟。

依稀景物似黃州。追擬蘇公前度游。清賞原無今古異。一江風月此宵秋。

星斗闌干夜色加。一雙歸櫓響伊鴉。多情獨有江天月。清影依依送到家。

送田邊淇夫應嵩村侯聘赴治城

草堂燈影夜沈沈。把袂同傾十載心。今日東溟無底水。如何及此別愁深。

新承寵命蒞邦庠。齒富才優誰復當。知得一藩敷藻教。

願分餘化及吾鄉。岩村與我加納相接故云。

鷺出谷六韻

歲律回燕谷。韶華到洛城。趣時如有約。求友豈無情。舊曲調猶澁。新衣刷始清。帶烟穿柳線。和雪啄梅英。雅客吟應富。紅閨夢欲驚。上林從此去。喬木好尋盟。

和高觀老臣服部君信里游郊作原三錄一

經國工夫要野謀。不唯行樂慰雙眸。笑他宣子徒酣適。漫把青錢掛杖頭。

元祿中。赤穗侯長矩封除。本藩先世正功公。食其後。而老臣篠原君之先世某。賜大石良雄遺第。

其厨壁有一貼紙。記曰。篤行鼓之法。必傳諸後人。且詳其調和之量。以故君家歲歲製之。至今百五十年矣。頃日。君見惠其鼓。因賦此鳴謝。所謂篤行。當時書以國字。今擇字填之。
石家當日已流亡。殘壁留傳製鼓方。豈料即今經歲月。忠臣遺味使入嘗。

首夏十三日。野田子明。大槻士廣。河田猶興。關克精。川崎叔道。來聚於草堂。

聯翩雅彥叩茅檐。記得今朝鵲語占。一社吟盟同臭味。百年浮世任涼炎。林梅有響迎風落。庭草無邊帶雨添。

醉裡笑挑剛手敵。燈前時設象棋匿。

東台豁如上人山房招集

滿山烟雨望蒼蒼。禪室留人話日長。習靜尤憐禽鳥近。清齋又愛筍蔬香。松枝帶露千釵濕。竹色含烟萬玉涼。兀坐渾消塵土念。恍疑身駕大慈航。

夏日即事

愛我家園與夏宜。高梧喬柳碧交枝。驕陽不及籬芭下。朝槿留花到午時。

夏夕即事

挾書終日走炎歊。薄夜歸來汗滿袍。一浴檐端迎素月。

得齋詩文鈔卷一
呼杯自慰晝間勞。

主君承緒始 賜暇赴治城。恭賦長律奉送。

新膺 恩例赴州城。歷盡岨山十日程。驛路秋風吹旆影。關門夜月照驄鳴。謙虛屈已容群議。惕厲圖治體衆情。不待微臣私祝願。遙知雨露及蒼生。

咏崔賀唐澤養真翁六十初度

雪翎霞頂自昂然。長避羣兒舞九天。應報瑤池王母宴。和鳴時近畫堂前。

得齋詩文鈔卷一

